



Qanoq iliornikkut eqqumiitsuliornermut isiginnittariaaserput kulturiinnarmut sunngiffimmilu suliaasaannartut attuumassuteqarunnaartillugu, annerusumik inuussutissarsiutitut akuerisaanerulersissinnaanera pillugu apeqquteqaat aallaavigalugu oqallissiaq.

(Inatsisartunut ilaasortaq Aqqalu C. Jerimiassen, Atassut)

Aqaal C. Jeremiassen qujanaq siunnersuummut.

Demokraatit kissaatigeqaat, eqqumiitsuliortut amerlanerit eqqumiitsuliaminnik inuussuteqarsinnaanissaat. Taallioortuuguit, atuakkiortuuguit, filmiliornermi iltersuisuuguit, qalipaasuuguit, kusanartuliortuuguit nipilersortarsuuguilluunniit, imaappoq, illit kisivit aaliangersinnaanagu eqqumiitsuliavit inuussutigisinnaanissaa.

Eqqumiitsuliatit inuussutigerusukkukkit, pilersitsisariaqarputit ima nuannarineqartigisunik, aningaasatigut inuussutigisinnaallugit.

Tamanna kissaatiginaraluaqaaq, ajoraluartumilli ikittuinnaat kisimik, tamanna periarfissarisarpaat. Amerlanerit eqqumiitsuliornermik saniatigut sulisariaqarput imminnut ilaquttaminnullu pilersorsinnaanarlutik.

Taamatut oqareerluta, Demokraatit ajoriffissaqartinngilaat eqqumiitsuliorneq inuussutissarsiutitut isigineqassappat. Immitsinnut eqqartuussisunngortissanngilagut, suup inuussutissarsiutitut isigineqarnissaanut. Isumarput unaavoq, inatsisit malillugit oorisorsinnaaguit, uagut soqutiginnigilluinnarpatput, qanoq ilillutit aningaasarsiornerit. Nuannarissagaluarpaput, eqqumiitsuliortutta pikkorissut amerlanersaasa eqqumiitsuliatik inuussutigisinnaaleraluarpatigit.

Tassunga atatillugu unamminarnerpaaq unaavoq, inuit ikittunnguugatta, taamaammallu, tuniniaaffissaqanngingajannerput. Nunatut allanut qiviarutta, imaappoq, eqqumiitsuliortut amerlanerit nunagisaminni tuniniaanermikkut aningaasarsiamik amerlanerpaat pisarlugit. Soorunami ilaqarput, nunani allani aamma sulisunik, amerlanerpaanulli taamaanngilaq. Unamminartoq taanna qaangeruminaatsorujussuuvoq, maani nunatsinni innuttaasut amerliartortorsuunngimmata.

Tassalu Demokraatit oqallinnermut isummersuutigigallagaat